



KENYATAAN MEDIA

KEMENTERIAN EKONOMI
JABATAN PERANGKAAN MALAYSIA

Blok C6 & C7, Kompleks C,
Pusat Pentadbiran Kerajaan Persekutuan, Presint 1,
62514, Wilayah Persekutuan Putrajaya
No. Telefon : 03 - 8090 4681

INDEKS HARGA PENGELUAR (IHPR) PENGELUARAN TEMPATAN, MALAYSIA JULAI 2025

Indeks Harga Pengeluar Malaysia mencatatkan penurunan lebih perlahan 3.8 peratus pada Julai 2025

PUTRAJAYA, 28 Ogos 2025 – Indeks Harga Pengeluar Malaysia yang mengukur perubahan harga di peringkat pengeluar, mencatatkan penurunan lebih perlahan 3.8 peratus pada Julai 2025, berbanding penurunan 4.2 peratus pada bulan sebelumnya. Ini dilaporkan dalam laporan bulanan terbaharu **INDEKS HARGA PENGELUAR (IHPR) PENGELUARAN TEMPATAN, JULAI 2025** diterbitkan oleh Jabatan Perangkaan Malaysia.

Ketua Perangkawan Malaysia, Dato' Sri Dr. Mohd Uzir Mahidin, menekankan, “Penurunan pada Julai 2025 terutamanya disebabkan oleh sektor Perlombongan dan Pembuatan, kedua-duanya mengalami trend penurunan sejak awal tahun. Sektor Perlombongan menurun 8.7 peratus (Jun 2025: -8.0%), dipengaruhi oleh penurunan dalam indeks Pengekstrakan petroleum mentah (-9.8%) dan Pengekstrakan gas asli (-4.7%). Sektor Pembuatan juga turun 4.0 peratus (Jun 2025: -4.3%), disebabkan oleh penurunan dalam indeks Pembuatan kok & produk petroleum bertapis (-15.7%) dan Pembuatan komputer, produk elektronik & optikal (-7.6%). Sebaliknya, sektor Pertanian, perhutanan & perikanan mencatatkan peningkatan 1.1 peratus (Jun 2025: -0.3%), disokong oleh indeks Penanaman tanaman kekal (3.1%). Sektor Bekalan elektrik & gas meningkat 4.0 peratus (Jun 2025: -0.2%), manakala sektor Bekalan air mencatatkan penurunan marginal 0.1 peratus pada Julai 2025.”

Dato' Sri Dr. Mohd Uzir Mahidin menjelaskan lagi, “Pada asas bulan ke bulan, IHPR Pengeluaran Tempatan meningkat 0.3 peratus pada Julai 2025, selepas penurunan

0.7 peratus pada bulan sebelumnya. Sektor Pertanian, perhutanan & perikanan meningkat 2.5 peratus (Jun 2025: -1.0%), disumbangkan oleh indeks Penanaman tanaman kekal (4.6%). Sektor utiliti, iaitu indeks Bekalan elektrik & gas dan Bekalan air, masing-masing meningkat sebanyak 3.4 peratus dan 0.9 peratus. Walau bagaimanapun, indeks Perlombongan kekal tidak berubah pada Julai 2025, selepas mencatatkan peningkatan 4.6 peratus pada bulan sebelumnya. Manakala indeks Pembuatan pula mencatatkan penurunan perlahan 0.1 peratus (Jun 2025: -1.2%), dipengaruhi oleh penurunan dalam Pembuatan komputer, produk elektronik & optikal (-0.5%) dan Pembuatan produk makanan (-0.4%).”

Mengulas lebih lanjut mengenai IHPR Pengeluaran Tempatan mengikut peringkat pemprosesan, Ketua Perangkawan menjelaskan, “Semua peringkat pemprosesan mencatatkan penurunan tahun ke tahun pada Julai 2025, meneruskan trend penurunan sejak Mac 2025. Indeks Bahan mentah untuk diproseskan selanjutnya turun 5.8 peratus, terutamanya disebabkan oleh penurunan dalam indeks Bahan bukan makanan (-7.0%). Indeks Bahan perantaraan, bekalan dan komponen mencatatkan penurunan 3.7 peratus, disebabkan oleh penurunan ketara dalam Bahan api yang diproses & pelincir (-9.3%). Indeks Barang siap juga menurun 2.4 peratus, terutamanya disebabkan oleh penurunan dalam Kelengkapan modal (-3.9%).”

Pada asas bulanan, indeks Bahan mentah untuk diproseskan selanjutnya mencatatkan peningkatan sederhana 0.8 peratus. Sementara itu, kedua-dua indeks Bahan perantaraan, bekalan dan komponen dan Barang siap meningkat sebanyak 0.1 peratus.

Perbandingan antara negara terpilih menunjukkan pelbagai trend IHPR bagi Julai 2025. Di Amerika Syarikat (AS), IHPR meningkat 3.3 peratus, berbanding kenaikan 2.4 peratus pada bulan sebelumnya. IHPR Jepun meningkat 2.6 peratus, sederhana berbanding peningkatan 2.9 peratus pada bulan sebelumnya, dipengaruhi oleh harga Peralatan pengangkutan dan Minuman dan makanan. Sebaliknya, China terus mengalami deflasi pengeluaran, dengan IHPR menurun sebanyak 3.6 peratus, sama seperti Jun 2025. Ini merupakan bulan ke-34 berturut-turut deflasi di peringkat pengeluaran, disebabkan oleh permintaan domestik yang lemah dan dagangan yang rapuh dengan AS. IHPR Thailand juga menurun 4.2 peratus, berbanding penurunan 4.0 peratus pada bulan sebelumnya. Ini menandakan lima bulan berturut-turut negatif inflasi pengeluaran tahunan, trend yang sama dengan Malaysia.

Mengulas mengenai harga komoditi terpilih Malaysia, Dato' Sri Dr. Mohd Uzir Mahidin menambah, "Menurut Bank Dunia, purata harga minyak mentah Brent pada Julai 2025 ialah USD 70.95 setong, menurun sedikit berbanding USD 71.45 setong pada bulan sebelumnya disokong oleh dasar bekalan. Pentadbiran Maklumat Tenaga A.S. (EIA) juga menjangkakan purata harga sekitar USD 70 hingga USD 71 setong dalam jangka masa pendek, sejajar dengan prestasi pasaran sebenar. Sementara itu, harga purata minyak sawit mentah (MSM) Malaysia mencatatkan RM 4,112.50 satu tan pada Julai 2025, meningkat daripada RM 3,969.00 satu tan pada Jun 2025. Majlis Minyak Sawit Malaysia (MPOC) menjangkakan harga MSM kekal pada julat RM 3,900 hingga 4,200 satu tan, disokong oleh permintaan kukuh dari China dan India serta daya saing harga yang lebih baik berbanding minyak kacang soya."


Kepengerusian ASEAN-Malaysia 2025: Jabatan Perangkaan Malaysia (DOSM) akan mempengerusikan Jawatankuasa Sistem Statistik Komuniti ASEAN Ke-15 (ACSS15) yang bertujuan untuk memperkukuh kerjasama statistik ke arah pembangunan serantau yang mampan.

Malaysia buat julung kalinya telah menduduki tangga pertama (1) di peringkat global dalam laporan dwi-tahunan *Open Data Inventory* (ODIN) 2024/25 yang dikeluarkan oleh *Open Data Watch* (ODW), mengatasi 198 negara lain. Pencapaian ini merupakan lonjakan ketara daripada kedudukan ke-67 dalam penilaian ODIN 2022/23.


Kerajaan Malaysia telah mengisytiharkan 20 Oktober sebagai Hari Statistik Negara (MyStats Day), dengan tema 'Statistik Nadi Kehidupan.' Sementara itu, Hari Statistik Dunia Keempat akan disambut pada 20 Oktober 2025 dengan tema '*Driving Change with Quality Statistics and Data for Everyone*'.

OpenDOSM NextGen adalah medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.


Carta 1: Peratus Perubahan Indeks Harga Pengeluar (IHPR) Pengeluaran Tempatan, Malaysia




Carta 2: Peratus Perubahan Indeks Harga Pengeluar (IHPR) Pengeluaran Tempatan mengikut Sektor (Tahun ke Tahun), Malaysia




Carta 3: Peratus Perubahan Indeks Harga Pengeluar (IHPR) Pengeluaran Tempatan mengikut Peringkat Pemprosesan (Tahun ke Tahun), Malaysia



Carta 4: Peratus Perubahan Indeks Harga Pengguna (IHP) dan Indeks Harga Pengeluar (IHPR) bagi Negara-Negara Terpilih (Tahun ke Tahun)





Sumber: Laman web rasmi *National Statistical Offices (NSOs)* terpilih

Dikeluarkan oleh:

**PEJABAT KETUA PERANGKAWAN
JABATAN PERANGKAAN MALAYSIA
28 OGOS 2025**